

Mid-Day Dogri News Bulletin, 28 February 2025

समे & 12:25 hrs.

<><><><><><>

PM-Talks

प्रधानमंत्री नरेंद्र मोदी होर अज्ज दिल्ली च यूरोपीय आयोग दे अध्यक्ष उरसुलावाँन डेरलेयेन हुंदे कन्नै प्रतिनिधिमंडल स्तर दी गल्लबात करंगन। डेरलेयेन होर कल भारत दी 2 रोजा जात्तरा उप्पर दिल्ली पुज्जा रदियां हियां। उन्दे कन्नै 27 यूरोपीय संघ दे आयुक्त बी मौजूद हे। एह यूरोपीय संघ दे आयुक्ते दी पैहली भारत जात्तरा ऐ ते एहदे कन्नै दवैं मुल्खें दे दपक्खी रियश्ते होर निगार होने दी मेद ऐ।

<><><><><><>

NC-Meeting

3 मार्च थवां शुरू होआ रदे विधानसभा दे बजट सत्र थवां पैहले सत्ताधारी पार्टी नेशनल कांफ्रेंस नै महत्वै आहली इक बैठक 2 मार्च गी सही ऐ। पार्टी दे नेता मुबारक गुल होरें इस बैठक गी लाए जाने दी तसदीक कीती ऐ। एह बैठक मुखमंत्री हुंदे आधिकारिक आवास च बैक्रेट हाल च दपैहरी 2 बजे लगगोग। बैठक दी अध्यक्षता मुखमंत्री उमर अब्दुल्ला होर करंगन। इस दौरान कई सारे महत्वै आहले पैहलुएं, जियां औंदे बजट, विधार्थी मामले ते होर सरबन्धी मामलें पर चर्चा होग।

गुल होरें आखेआ जे इस चर्चा दा मकसद नीतियां बनाने ते माली फैसले लैने जनेह विशें पर केंद्रित होग ते एहदे राएं पार्टी दे नजरिए गी बी आकार थहोग।

<><><><><><>

JK Commission

जम्मू-कश्मीर दे मकामी निकाएं आसेआ समर्पित पिछड़े वर्ग दे आयोग नै कल मुख सचिव अटल डुल्लू होरें गी अपनी अखीरी सफारिशां सौंपियां। सेवानिवृत्त न्यायमूर्ति जनक राज कोतवाल हुंदी अगुवाई च आयोग गी ओबीसी प्रतिनिधित्व बारै अनुभवति अध्ययन करने, हितधारकें कन्नै गल्लबात करने ते शैहरी ते ग्रामीण मकामी निकाएं दौनें लेई बक्खरे-बक्खरे तौरा पर आरक्षण दी सिफारिश करने दा कम्म सौंपेआ गेआ। आयोग दा कार्यकाल जेड़ा दिसंबर 2024 च समाप्त होआ रदा हा, उसी फरवरी 2025 तगगर बधाय़ा गेआ ऐ।



Food Safety Jammu

खाद्य सुरक्षा, खाने-पीने आहली चीजें दे म्यार ते लोके दी सेहत दी हिफाजत दे सरबंथै च चलाए जा रदे जत्तें तैहत जम्मू दे अडिशनल डिप्टी कमिशनर राकेश कुमार होरें जिले च कई सारे कारोबारी इदारे पर इक लख 54 ज्हार रपे दा जुर्माना लाया ऐ। एह जर्माना खाद्य सुरक्षा ते मानके सरबन्धी कनून 2006 तैहत लाया गेआ। इस दौरान उत्पादके, विक्रेताएं वगैरा पर जुर्माना लाया। एह ओह लोक हे, जेड़े घटिया जां फही पूरे तय मानके थवां घट्ट दे म्यार आहिलियां चीजां बेचा रदे हे।

प्रशासन नै कारोबारी इदारे गी आखेआ ऐ जे ओहू पूरी साफ-सफाई, नियमित तौर पर म्यार दी जांच ते FSSAI आसेआ दित्ते गेदे दिशा निर्देश मूजब सेई चाल्ली लेबलिंग करन। सरबन्धी कारोबारी इदारे गी आखेआ गेआ ऐ जे ओहू खाद्य सुरक्षा दे मानकें दा ध्यान रक्खन तां जे लोकें दा सेहत पर असर नेई पवै ते इनें इदारे गी ज़र्माना बी नेई देना पवै।



Water Yatra Poonch

पानी दे संरक्षण गी बढ़ावा देने दे मकसद कन्नै पुंछ दे डिप्टी कमिशनर विकास कुंडल होरें डी.सी दफ्तर परिसर थवां वाटरशेड जात्तरा दी शुरूआत करोआई। एहदा मकसद आम लोकें च वाटरशेड विकास बारै जागरूकता पैदा करना ते लोकें दी शमूलियत गी बढ़ाना ऐ। एह जात्तरा सरकारी हाई स्कूल कुलेनी जाइए सम्पन्न होई। इत्थे कई सारे जागरूकता कार्जक्रमें दा सरिस्ता कीता गेआ। इस मौके प्रतिभागिणें जेदे च विद्यार्थी ते समुदायिक नेता बी शामिल हे पानी दे संरक्षण लेई प्रण बी पाया।

<><><><><><>

Traffic

जम्मू-श्रीनगर राश्ट्रीय जरनैली शिड़क पर नाशरी ते नवयुग सुरंग बश्कार कई सारी थाहरें पर लगातार बरखा होआ रदी ऐ ते कई थाहरें कुप्पड़ बी पवा रदे न। इस करी करी गड्डिणें दी आवाजाई दौनें भेठा दा बंद ऐ। विभाग नै उच्चिणें धारें पर बर्फबारी ते भारी बरखा होने दी पेशगोई कीती ऐ।

लोकें सलाह दिती ऐ जे ओह मौसम सरबन्धी परामर्श दे आधार पर गै अपनी जात्तरा करन। कोई बी व्यक्ति जात्तरा थवां पैहले इनें नम्बरें 94199-93745 ते 18008-07043 पर राबता करिए जानकारी लेई सकदा ऐ।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा,

डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी पिन कोड 180001 उप्पर उप्पर 07 मार्च 2025 थवां पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><><><>